

Date – 01/04/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Ram pum Chhiarpui chu ram chhung hmun dangte rualin vawiin atang khan Mizoramah pawh tan a ni.
2. Kum 2026-2027 Academic Session atana High School leh Higher Secondary school luh tan ni vawiin khan Mizoramah zirna kalpui tan a ni.
3. Mizoram University Department of Botany chuan Sekhupthur species thar "Begonia mizoramensis" an hmuchhuak.
4. Assam Assembly inthlan neih turah party hrang hrang-ten campaign beihpui an thlak chho mek.



CENSUS-MIZORAM

Ram pum Chhiarpui chu ram chhung hmun dangte rualin vawiin atang khan Mizoramah pawh tan a ni.

Chhiarpui hna thawktute chuan mihring chhinchhiah hna ni lovin in ding lai leh a chhunga chengte dinhmun leh an bungraw neihte chhinchhiah hna (house listing) in bul an tan a. Vawiin vek hian Chhiarpui atana online kaltlanga mahni inziahlul leh inthun theihna self enumeration portal chu hawn a ni.

Chhiarpui-Houselisting leh Housing Census bultan nan hian tukin khan Chief Minister Pu Lalduhoma chu a chenna inah a inziaklut a. Chief Minister hi Directorate of Census Operations, General Administration Department leh Aizawl Municipal Corporation officials pawimawhten an tawiawm a. Chhiarpui an kalpui zuina turah duhsakna a lo hlan a ni.

Akashvani News Aizawl zawhna chhangin, AMC Municipal Commissioner, Aizawl Principal Census Officer ni bawk, Pu Joseph H.Lalramsanga chuan India ram Chhiarpui vawi 16-na, Census of India 2027 hi thawh hniha kalpui tur niin, a thawh 1-na chu vawiin khan Mizoram pumpuiaha kalpui a ni a, Aizawl-ah chuan Houselisting leh Housing Census bultan nan tukin khan Chief Minister Pu Lalduhoma chu a chenna inah a inziaklut a ti a. Self-Enumeration hi ni 15 chhung a tih theih dawn tih sawiin, tun thla April ni 16 atangin Enumerator te chu in tin leh

chhungkaw tinah kalin, Self-Enumeration tih te chu an endik dawn a ti a, chhiarpui hi a pawimawh em avangin tuang taka kalpui a nih theih nan chhung tinte chu thawhpuih a sawm a ni.

Byte: AMC Municipal officer Pu Joseph H.Lalramsanga

Tun tum Chhiarpui hi in tina luha mihring chhiar a ni dawn chungin lehkhapuan hmang lovin, a vawikhatnan digital hmang veka kalpui a ni dawn a. Digital a kalpuina-ah hian mobile apps hman a ni dawn a ni. Chhiarpui kalpui hun tur kum 2021 khan Covid-19 hri leng avangin kalpui a ni ta lova. Tun tum hi kum 2011 hnu a India ram Chhiarpui awm leh hmasa ber tur a ni dawn a. Sawrkar chuan chhiarpui hi tuang leh fel fai taka a kal theih nan khua leh tui te chu mahnia inziaklut turin a ngen a ni.

Chhiarpui Thawh hnihna - mihring chhiarpui tak tak Population Enumeration chu nakum 2027 February atanga neih tan tur a ni ang.

<><><>

CM

Chief Minister Pu Lalduhoma'n Serchhip Dist Hospital ah Dialysis khawl 2 a hawng.

Serchhip Damdawi inah naktuk atanga hman nghal tur Dialysis khawl pahnih hawngin, Chief Minister chuan thawktute leh Doctor te chu Pathian rawngbawlna a nih pawm tura chahin, sum harsatna avanga enkawl theih loh an awm loh nan tan lak puiah a sawm a, sum amah pawhin theihtawp chhuaha a ngaihtuahpui tur thu a sawi.

Pu Lalduhoma chuan natna chu fimkhur loh vang leh rilru lam hrisel lo tur thunun thiam loh vanga awm te a nih ve bawk avangin taksa lam leh rilru lam inthunun thiam a pawimawh a ni a ti a. Mizo te hriselna a tlahniam nasa a, a bik takin Mizo mipa an thi tam lutuk a nakin lawka mipa leh hmeichhe inzat lo lutuk in harsatna a la thlen dawn a ni a ti a, hrisel tur chuan ram a dam a ngai a, chenna hmun thing leh mau leh nungcha te an dam a ngai a ti.

Dr Lalhriatpuia Chhangte sawi danin Serchhip Damdawiina Dialysis khawl hawn takah enkawl tura hming pe mi 11 zinga 7 enkawl tura thlan an ni a. Kar khata wawi hnih en tur chi aia tam chu hmun danga en an ngai a ni.

Serchhip Damdawi in a Dialysis khawl enkawl hna thawk tur hian staff 5 an awm a, an zinga pakhat chu bialtu MLA fund atanga hlawh pek tur a ni.

<><><>

NEW SESSION

Kum 2026-2027 Academic Session atana High School leh Higher Secondary school luh tan ni, wawiin khan Mizoram hmun hrang hrangah zirna kalpui tan a ni.

Kan corr report ngaithla ang.

Mizoram sorkara School Education department-in kum 2026-2027 High School leh Higher Secondary School Academic Session chu wawiin April ni 1 atanga tan tura a tih angin, sorkar thuchhuak zawmin, Mizoram hmun hang hranga High school leh Higher Secondary school te chuan zirna in an hawng tan a, hetihruah hian private school engemawzat te pawhin wawiin atang hian Primary leh Middle

zirlaite tan school an hawng tan bawk a. Zirlai leh zirtirtute chuan sikul kaiin, inhlan tharna hun an hman bakah sikul thenkhat chuan an sikul hmunhma leh a chhehvel tihfai hnatlang an nei bawk a, zirtirtuten zirna hawn tan ni ah hian an zirlaite lo hmuakin, an lo dawngsawng bawk a, zirna in tanni ah hian hun tha tak an hmang hlawn a ni.

Kum 2026-2027 High School academic session ruahman dan chuan First Term exam leh result puan chu July ni 7 atanga July ni 17 chhunga peih fel hman tura tih a ni a. Second term chu July ni 21-a tan tura tih niin exam leh result puan chu October ni 19 atanga October ni 30 chhunga peih fel tura tih a ni.

Third term hi November ni 3-a tan tura tih niin December ni 21, atanga January ni 5, 2027 inkar chu thlasik chawlh atana tih a ni a. Third term exam leh result puan hi January ni 18, 2027 atanga January ni 29, 2027 chhunga tih fel tura rel a ni.

HSLC examination chu February 2027 chhunga buatsaih ni se tih a ni.

<><><>

NEW PLANT SPECIES

Mizoram University Department of Botany chuan Sekhupthur species thar "Begonia mizoramensis" an hmuchhuak.

A species hming hi Mizoram hming chawi a phuah a ni a, Thiak ah leh Khawrihnim ah hmuhchhuah a ni.

He thlai hmuhchhuah thar hi ral mai thei dinhmuna ding niin, Conservation status Critically Endangered (CR) ah dah a ni a, research paper hi Taiwania Journal ah online a en theih a tihchhuah a ni.

<><><>

HAULAWNG GINGER

Tunlai hian Lunglei Dist-a Secondary Collection Centre ah Sawhthing hralhchhuah mek a ni a.

Haulawng SCC President Pu Zuimawia chuan tukin khan bag 399, Kg 11,970 an hralh tih sawiin Kg 1 cheng 25 in an hralh a. Tuntum ami hi sample ang chauh a lei a ni a phailama an pawm chuan a dang pawh lei leh turin an in thlah a ni a ti.

Haulawng SCC hnuaiah hian khua 11 awmin a tirah chuan quintal nuai 3 thar turah an in chhut a, mahse Sorkar a chet tlai deuh avangin quintal nuai 1 vel chauh thar an in ring tih an sawi. Tunah hian bag 2000 vel chawhsa a la awm thung an ti a ni.

Lunglei dist ah hian Collection centre hi 4: Hrangchalkawn, Tawipui, Haulawng leh Buarpuiah te awmin Tawipui leh Haulawngah hralh mek a ni a, Hrangchalkawnah chuan hralh tur a awm rih lo a ni.

Hetihlai hian Buarpui SCC ah chuan kg ah cheng 24/- a lei duh an awm, mahse loneitu te hian an hralh ngam rih lo a. Hemi chungchangah hian Buarpui SCC President Pu Zonunchama chuan sorkar in support price a pek tur zat an hre lova,

chuvanga hralh ngamlo an ni tih a sawi a ni. Tunah hian sawhthing chawhsa bag 3000-4000 vel a awm mek tih sawiin loneituten an remchan dan ang ang in an dah tha rih a ni a ti.

Buarpui khuaah hian sawhthing chingtu Society a in ziak lut chhungkua 132 an awm a, a ching tam chuan qtl 15 te an ching a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ASSAM ELECTIONEERING

Assam Assembly inthlanpui neih turah party hrang hrang-ten campaign beihpui an thlak chho mek a, Prime Minister, BJP hruaitu senior ni bawk Narendra Modi-an vawiin khan Assam hi tlawhin Gogamukh leh Biswanath-a vantlang inkhawm buatsaihah thu a sawi a, mirethei leh mi narante dinhmun chawikan chu BJP ngaihpawimawh ber pakhat ani reng tih sawiin hmasawna ruhrel, zirna leh healthcare lamte pawh a ngaipawhmawh a ni, a ti.

Cong hruaitu senior, Priyanka Gandhi Vadra pawhin Sivasagar Dist Nazira-a Mackeypore thingpui huana vantlang inkhawmah thu a sawi a, BJP kaihhruai sorkar chu na taka sawi selin thil man punna rate sang chho zel te, nitin khawsak man sang chho zelte chu khua leh tuite tan phurrit a tling a ni, a ti.

<><><>

EC SUSPENDS BDO

Assembly inthlan nei tur West Bengal-ah Ranaghat-a training neih laia polling official pakhatin kut a tuar chungchangah training prog in-charge Hanskhali Nadia Dist Block Development Officer, Sayantan Bhattacharya chu Election Commission-in a hna atangin a suspend a, a lakah departmental inquiry nei nghal turin state Chief Secy a hriattir bawk.

Thudawn danin, March ni 27-a Debnath Institute-a training session neihnaa Chief Minister Mamata Banerjee leh Digha Jagannath Temple fakna video chhuah tum polling official-ten an sawisel a, buaina chhuak zuiah zirtirtu, Saikat Chattopadhyay chuan hliam na tak a tuar a, Ranaghat Police Station-ah FIR thehluh a ni.

<><><>